

般若波羅蜜多心經

唐三藏法師玄奘譯

觀自在菩薩。行深般若波羅蜜多時。照見五蘊皆

空。度一切苦厄。舍利子。色不異空。空不異色。色

即是空。空即是色。受想行識。亦復如是。舍利子。

是諸法空相。不生不滅。不垢不淨。不增不減。是

故空中。無色。無受想行識。無眼耳鼻舌身意。無

色聲香味觸法。無眼界。乃至無意識界。無無明。

亦無無明盡。乃至無老死。亦無老死盡。無苦集

滅道。無智亦無得。以無所得故。菩提薩埵。依般

若波羅蜜多故。心無罣礙。無罣礙故。無有恐怖。遠

離顛倒夢想。究竟涅槃。三世諸佛。依般若波羅蜜

多故。得阿耨多羅三藐三菩提。故知般若波羅蜜多。

是大神咒。是大明咒。是無上咒。是無等等咒。能

除一切苦。眞實不虛故。說般若波羅蜜多咒。卽說

咒曰

揭帝 揭帝 波羅揭帝 波羅僧揭帝 菩提僧莎訶

般若波羅蜜多心經